

四庫全書

集部

欽定四庫全書

禮部集卷五

元 吳師道 撰

古詩

寄張師夔求畫

我于山水宿好敷早年畫亦窺其藩却觀作者還自愧
一朝棄去無留痕張君妙悟有天趣不待師授知根源
宦遊往往得佳勝目力所至氣已吞煙雲莽蒼瀟湘浦
樹石慘淡江南村漁梁茅屋帶林薄點綴清妍難具論

宛陵城中數相過襟還縑素方填門謂予雅愛不見索
豈有強求持璵璠君不見燕公一筆斬豪貴王宰不受
促迫煩古來奇士多異俗所以千載名長存吾言如斯
亦非激君諾已定應無議

舟行得風

江豚印鼻噴驚波秋來江風西北多掣帆鼓蓬疾于電
銀屋怒擁高嵯峨江南江北青山色著意相看忽如失
我行小遲亦何害人生取快寧多得買人舟子勿嘯呼

野有垂泣耕田夫三月不雨田水枯

過池陽遊齊山洞

城南飛橋跨清溪度橋並轡千丈堤堤窮水盡翠微出
繫馬道傍尋杖藜巉巖石骨不見土一色斲削青玻瓈
恠岩竒壑紛左右絕頂俯睨長江低當時登高插菊處
至今勝日爭提攜荒亭已頽斷碣仆霜草滿地寒蟬啼
杜郎風流杳何處祇有茲山仍號齊其間一洞景更絕
喜子曾遊知舊溪踰岡陟巘數里險路斷忽復忘東西

石芒鈎衣藤冒帽荒榛叢篠交冥迷遙呼野人問不識
下趨却踏湖邊畦前瞻佳處似彷彿興倦不惜重攀躋
徑穿蒙密得窺穴俛首匍匐膝拄臍日光忽漏天宇小
所見政爾如醢鷄流蘇垂蓋結高屋旁入詰曲房與閨
卦著二碑史氏植欲讀奈此苔蘚泥斯人好事世亦少
挽蘿仰視茫無梯崖間名字半磨滅後來遊者猶堪稽
洞中風出蝙蝠亂日暮雲氣寒淒淒返尋林麓出山下
虎跑歷歷皆新蹄僕夫驚喜行路詫歸來追憶猶神悽

平生好奇已成癖世途良倦思
岩栖模碑幸寄却細讀我詩
仍欲煩鐫題

錢舜舉摹李伯時畫鳳頭驄圖

汴都五馬來西域當時總入龍
眠筆錢郎摹得鳳頭驄想見
羣中更殊特大宛渥洼挺龍
種開元內廐森天骨超然意
氣欲爭雄直比來儀稱瑞物
宋人兵力非漢唐裕陵開邊
徒擾攘鬼章成禽侈告廟于
闕效職脩來王吁嗟元祐乃
致此信是當國謀謨良諸賢
一去寧復得

此馬不在吾何傷

赤松山圖

昔年曾踏山中路路入桃源正春暮落花撲面東風來
飛觥遙石流泉去拂衣起隨醉道士為指皇居牧羊處
山空石化草芊芊祇有荒祠映高樹神仙之館多飛樓
鋪牀對卧樓上頭松聲澗響雨娛客終夜琴笙不肯休
十年身墮黃塵底乍喜歸來山尺咫開圖眼中赤霞起
萬嶂千峯翠相倚寄書約我同心子再曳青鞋從此始

往年與張
子長同遊

挹翠軒為監州貫子素作

廣文官舍青山圍，青山不受人招麾。
使君胸中有掘竒，大揮椽筆坐致之。
霏烟落几送秋色，岩樹排闥呈春姿。
清英之氣不盈掬，淨洗塵土仍充飢。
紛紛倚席庸妄兒，豈比今掾稱能詩。
一朝為兒發光彩，寧復打頭嫌屋卑。
使君退食常委蛇，岸幘燕坐同衿期。
琴清茗冷半醉後，雲去鳥還微咏詩。
野人來窺門外屨，一笑倘許相追隨。

柴門曉色圖

先生早賦歸來篇
柴桑草屋依園田
重華技遠汨迸泉
聊復以酒陶其天
野人田夫相周旋
偶失姓字寧非賢
清晨扣門來翩翩
手中有攜壺負肩
更進觴酌雜亂言
醉即麾去我欲眠
氣韻太古羲皇前
祇此自足垂千年
匡廬影落晴江邊
故墟老木淒荒煙
我嘗過之心惘然
是圖物色誰摹傳
願起九原從執鞭

蠶桑圖

詩圖草木蟲與魚就中寫出幽風圖忠臣方寸寓物色
欲使目擊知艱虞公宮親蠶古遺制手持青青看風戾
四海枝條雨露春萬家機杼升平世誰知後有歌舞荒
裁雲剪鳳金煌煌歲輸不了一日費紅女夜泣寒無裳
畫師此意誰能識不寫尋常竒麗質數葉娟娟即諫書
品目人間當第一

仙壇秋月圖

宮扇馬遠畫宋寧宗后楊氏題詩自稱楊妹

子

宮中美人秋思多夜揖明月追仙娥畫闌桂樹倚樓闌
碧落天壇飛珮珂畫師不解西風夢筆端便有華陽洞
更將妍畫寫清詞輕扇君王心已動炎精季葉堪嘆嗟
矧爾妖麗傾其家申生遺禍到濟瀆府中丞相真奸邪
吳宮一掃荒煙冷舊事淒涼復誰省百年永鑒不可忘
留與人間看扇影

元詩 人道中秋明月好欲邀同賞意如何華陽洞

裡仙壇上今夜清光此處多

此白樂天作

五月一日即事

黑雲滂渤如頽山白雨注地聲潺潺須臾雲散雨亦歇
斜陽襯著高林間林間沉沉萬濃綠影弄微風自相觸
新蟬忽作去年鳴使我凄然感心曲

歷山尋真觀

縣西倚江勢寥曠岡嶺綿延高作障歷山壤界接東流
道家樓觀森南向重華遺跡豈在茲俚俗相傳恣誣誑

黃冠尤更緣禮法旁屋卑栖龕帝闕三池人言有靈物
禱崇累累挈瓶益我為旱請不敢詰亦惟鞠躬修俛仰
煩衿畏景方兩劇臨下憑高聊一暢隔山遙認舒州山
隱隱孤城拍煙浪

七月十八日出郊外抵昭潭
泐道觀蟲食松葉
盡枯感而賦

縣南縣北幾百里
泐道蒼松半枯死
蠹蟲無數枝上
縣食盡青青成蠹子
雪霜不朽千年質
摧敗一朝天所使

殘髯磔磔怒猶張
流膏滴滴泣未止
頓令林壑少光色
政似鱸鯨困螻蟻
土人云此實旱兆
昔歲逢之旱無比
炎風烈日勢轉虐
更說飛蝗西北起
救災無策空自嗟
誰能為挽天河洗

謝張稅官惠山水圖

昔經九華溯清溪
還向齊山踏翠微
歸來却睹公詞畫
夢境恍惚心神飛
一官復忝府下邑
心勞政拙遭年飢
清遊高咏事遂息
遙看數舍徒依依
長身張公江海客

相逢墮此荒山園手揮東絹兩巨幅親自持送扣我扉
寒林枯木帶雪色春江遠浪搖煙霏挂之空壁淡相對
想見盤礴深天機頗聞輕舟數來往應識弄水亭前磯
援毫乘興為一寫重與此郡增光輝商征奇羸籌弄急
白頭落落知音稀胷中磊砢故未減局促肯受塵埃鞿
金華幽人亦念我嘆息歲晏何當歸

李溉之賦廬山雪夜舊遊商德符畫

王郎孤撐剡溪雪謫仙醉吟采石月何如彭蠡雪月舟

前望匡廬中夜發松林燈火深幽幽僧窻澗瀑寒颼颼
李公之詩商公畫謂是奇絕平生遊乾坤清明浩無際
俗子塵衿那得值詩畫同成一段奇彼此天機自深契
鄙人好畫復好詩仙舟可望不可追都門昔別二十載
展卷動我長相思卧遊八極誰能羈月天雪夜如見之

至治辛酉為李公
作雲卧八極賦

池陽紀事

至元四年十月冬池府承命兩馬驄惟池學廩素贍豐

十奪七八歸豪雄爾行按覈務盡公校官遣偕俱謬庸
惟有姚璉心頗同貴池屬邑最近鄉拏舟此去宜先從
人言羣惡張其鋒昔歲往者人馬傷焚香再拜先聖宮
願依皇靈保微躬沙夾一帶臨大江上有牧地連元戎
悍卒夜伏蘆葦茸按行不侵循舊封伏者引去無留蹤
官湖周遭十里通數家根據窟其中良田美稼供螟蟲
按圖詰實辭皆窮歸途却遠山之東小屋突出婦女翁
前遮行輿扼其杠白挺四出相奔冲忽擒一夫捽其臂

愬茲事者衆所攻捶擊宛轉恣毒凶止之不可徒忡忡
為陳法理開其聰稍復散去穿棘蓬古來王官勢穹崇
尸取鼠輩須臾空我今有志權不充念之羞憤徒滿容
明朝港出新河旁遡江未遠騰顛風排磯怒響如撞春
倉皇未及挂短篷桅檣傾側浪濺窻已分投骨歸魚龍
一卒力勝百舵工正帆近岼離奔猱同舟神色方怡融
此行不謂有此逢善人每倚天為宗天亦愒我何蒙蒙
書生昧事真愚蠢猶欲區別見寸功微官已及三年終

歸歟歸歟逐輕鴻

潘默成鄭北山手帖

潘公挺挺立雪松鄭公矯矯當道熊扞排老檜竟死終
平生大節將無同豈無他人筆畫工兩公聯比得所從
再拜稽首桑梓恭凜然百世猶清風

代柬吳子彥提舉

將為福建船官

相君作楫功有偉誰甘不渡橫野水天上亦有船司空
人間莫羨魚蠻子米家書畫光燭天不知定占幾萬錢

玄真天隨易約束且放蓮葉浮空仙

李龍眠飛騎習射圖

龍眠手帖云元豐初點簡南宮試卷畢更預
集英殿門應奉廷試因得至衛士班見飛騎
習射校毬揚技戲時乘輿將幸寶津令追圖

大槩云

東都全盛稱元豐天子慷慨思奇功蒐兵閱馬振百度
坐欲折箠笞羌戎羽林衛士天下選內殿汗血皆飛龍

射毬穿柳雖戲劇移置行陣寧非雄從臣絕藝龍眠翁
曾候喚仗明光宮斫髻飛毬親眼見十年落筆逾精工
君不見開元天寶馬蕃庶畫手亦有曹韓同承平涵育
賴休澤人與物會真竒逢好頭赤玉五花驄轉首一笑浮
雲空盛衰反覆古今夢寶津無樹吹秋風紛更擾擾竟
何益禍啓大梁塵再蒙披圖考古三歎息我思聖人憂
日中

秋山樓觀圖

柳道傳嘗傳以荆浩所作巨幅縮成小卷

奉常先生客燕都縱閱三館之圖書秋山樓觀忽到眼
印章猶是宣和儲當年絕藝洪谷子身在太行秋色裡
萬里雲飛木落時遙寫朱闌半空起先生恢廓山水宵
紛紛畫史難為工偶窺得意微妙處自出變態經營中
蘭亭易用燈展影梓人乃以堵畫宮莫言尺素非巨幅
形體雖異精神同京塵歸來二十載篋中寶氣騰晴虹
一邱一壑金華下以道卷舒無愧者淡然誰識先生心

許我閒來時看畫

紅玉杯為陳雲嶠太祝賦

夷人採玉河源水夜候霞光矗空起持歸萬里售中州
琢刻為杯世無比截肪栗色非不奇雞冠通赤希見之
筵間乍置爭注目誰復更顧黃金卮小槽新壓真珠滴
擎向桃花花下吸但餘落日爭光輝未許妖姬比顏色
主人今代陳孟公閉門留客酒不空千金之裘五花馬
不惜買醉酬春風公侯家世多珍物獨寶此杯為故笏

華堂舞罷飲闌時
什襲深藏莫利缺

送達天山之江浙簡校

君家世朔漢來住
嚴陵州嚴陵接蘭溪
一水清悠悠一
水中間不相識
數千里共京華
遊今晨過門索詩句
却挂雲帆向南去
禁林秘府歷已周
去坐錢塘省中署
省署官清秩更優
勾檢諸曹替機務
曾中書傳今得試
況乃年華未遲莫
西湖春水生綠波
嚴陵咫尺先經過
迎家俱來笑且歌
薤露老生雙髻皤
手不停披口吟哦
無

功祇恐遭譏訶都門見柳鄉思多送君行兮將奈何

三月十八日張仲舉趙伯器吳伯尚王元肅同
遊西山玉泉遂至香山

肅清門外春草青背城曼衍趨郊坰西山曉晴出蒼翠
高下不斷如連屏道傍巨家烏鳥噪寒食野祭道羶腥
溝深路狹雪泥在緩控瘦馬仍鈴蹕行行山近寺始見
半空碧瓦浮晶熒先朝營構天下冠千門萬戶伴宮庭
寺前對峙兩飛閣金鋪射日開朱樞截流累石作平地

脩梁雄跨相緯經平臺當前白玉座刻鏤精巧多殊形
常時御舟此遊幸清簫妙管魚龍聽沿堤萬柳著新綠
未見蒲葦彌煙汀鳬飛鷺起渺空闊使我清思凌滄溟
遊船兩兩棹歌起亦有公子攜娉婷主僧說法據高座
撞鍾擊鼓聲發寔欣然肅客道周歷顧瞻幻恠何神靈
後園小殿翳花木繡幃香閣猶深扃坐陪方丈談疊疊
伊蒲清供分餘馨出門暄風掠人面前趨復歷峴與陁
泉乾土勁草樹少祇有廣塔高亭亭香山蘭若金源舊

猶餘大定殘碑銘長松老檜見未有澗水遶屋鳴清冷
扳危陟峻劇喘汗却下迅走誰能停班荆列坐杏花底
持觴受此香雪零日規漸隱半峯側酒行不盡雙玉餅
衆賞未醉有餘興惟我却飲嗟獨醒疾驅信馬路已熟
遙見樓堞塵冥冥歸來門巷未深黑春雲黯黯明疎星
廣文官况淡于水矧復聚散如浮萍玉泉頗恨不少住
客意更擬同揚舲明朝清遊墮夢境擁書却坐槐陰廳
題張仲舉為鄉人作西原隱居記後

張公夙有山林趣為愛西原隱居處拄杖穿雲記昔遊
結屋臨遊約同住國風詩裡桑十畝太史書中棗千樹
故鄉樂土不可忘一笑歸來未遲暮

陳教授捕蝗寶坻

去年之夏幾生蟲捕除分道疾如風寶坻從事心獨苦
調選強力休罷癘焚香禱神神與通蝗自相食一夕空
大書聯帛擁歸馬兒童父老爭言功我聞開元相姚崇
按稽古法畀火攻目前除患事應爾潛孚乃在冥冥中

當今明良布德澤四錢米斗何難同近聞遺種時出地
若遣督捕無如公

分題賦絳守居送王致道僉事之河東

昔年好誦絳守文苦厭箋注徒紛紜細推艱辭屬斷句
恍若皦日開霾昏姬周文訖西漢絕八代委靡如瀾奔
韓門巍巍誰得闖兩馬駒出盧與樊聲牙詰曲漫自喜
豈比盤結妙理源重歌月蝕志魁紀似挽奇險歸雄渾
南陽遺編盡零落東雍故刻偏完存精華秀發絕塵語

豈但鬼眼并淫翻高才徃徃或橫出亦有繩削全不煩
後來摹擬風更下務以怪勝棘古根平生未識守理所
正恐謬訛乖討論中朝御史出持節按轡歷歷咨周爰
省風訪古亦廼職為我一弔殘池園栢槐高下幾歲植
虎豹西南何處門蹴墉彷彿隄北努望月想像渠東騫
甲辛池泓梁子午遠岡近閭隰復原宴遊賓旅鍾鼓樂
亭臺花木闌井軒荒基廢迹應莫辨祇見古流猶入汾
鉢心搯胃良亦苦臨風三酹招其魂先生鄒魯文雅馴

玉堂潤色美言論咸池大章已高卷聊遣巴渝充下陳
嗟予宿有好古癖莫笑蹇淺疲精神幸詢故實補遺闕
以自娛悅貽童孫

百魚圖

小魚戢戢同隊嬉羣魚出沒相追隨鰕公掉尾殿其後
氣食變化非凡姿水深蒲藻相因依嗟魚之樂魚自知
畫師點綴百態具問爾當日何由窺大眾密網紛如織
鬻市何曾持盈尺有生嘗抱竭澤憂相戒徒聞過河泣

江湖新水春拍天安得魚我俱悠然聞道君王闢靈沼
願繼周頌多魚篇

三月廿三日南城紀遊分得朝字

蘿鹽老生雙髻凋長年挾策陪吟謠春光忽盡餘一日
休暇幸此同揚鑣南城塔廟不知數徃徃遺跡傳金遼
頽垣廢巷多委曲高門大館何寂寥舊時宮闕向南路
脩廊千步應迢迢豐宜門頭楊柳色壞障突兀留雙標
人家漸稀野景曠灣迴綠水低平橋牡丹藝植此最盛

哇連畝接相縈繚望彌數里地如繡千本萬本爭嬌嬈
深紅淡白態各異黃紫不數魏與姚雒陽風上說前代
却視幽異偏蕭條天都王氣鍾地脉坐受北面羣花朝
徐熙趙昌死不見安得對此圖生綃水遶小亭客可款
置酒折花忻見招霞舒雪卷炤四壁時有落絮來飄飄
縱談文字送觴酌間以嘲謔更喧囂雲陰慘淡雨欲落
祇恐日暮歸途遙須臾點亂草葉動白楊樹遠聲蕭蕭
水淋衣裳泥濺帽疾走十里趨城譙同遊莫怨歡事阻

天意欲活田間苗，觚稜金爵麗斜日。曖曖天宇開微霄，
向來却恨不少住。過門下馬仍相邀，人生會合豈常得。
況有師長聯賓僚，病憂不飲浪自苦。歸來磊砢誰能澆，
故園桃李夢飛到。鍾鼓驚喚催明朝。

分韻賦二疏供帳圖送王善父司業致仕歸

長安城東門雜遝，送客車客車數百兩。高蓋蔭華裾，西
都明主優賢日。東海老臣辭位初，一家父子信奇事。況
乃同時還里閭，停車下馬坐張次。轅牲行酒却躊躇，當

時送者亦可喜惜哉名字無人書黃塵漫漫長安路疾
足高才恣馳驚祇見人覓公卿來不見人送公卿去朝
衣載束輓絳歌薤露何如白首樂故居趣賣黃金日供
具賢哉疏大夫此事從古無後來復有楊司業昌黎稱
是斯人徒王公官與楊公比一旦飄然亦相似高節清
風凜終始喚取良工續畫圖共仰脩名照青史

分題賦三高祠送馮公厲叅政之江浙省

陶朱半策傾強吳功成攜家浮五湖洛陽仙客思蓴鱸

秋風挂冠不少須角里先生傲屠沽日採杞菊充庖厨
三人世異出處殊高哉一節同是今所無吳江之水通
具區垂虹千丈脩亭孤烟波冥冥七十二峯碧想見精
爽不死來往猶躊躇明公出鎮行中書路經祠下斂容趨
往來其間豈不可報國未敢辭馳驅福星夜炤東南隅
顛崖願見蒼生蘇時清無事不須避他年畫取歸去扁
舟圖

題趙氏得母詩卷

安福趙伯深逢原靖康之亂失母所在日飯
道流覬覦冥報後從辟夔門道中遇有虎因
小憇逢所飯者告以母在瀘南遂尋訪以歸
朱公刺血書梵唄趙公施食邀簪佩人言二氏力有神
百里歸來母同載嗟哉彼教捐恩愛豈識本真天性大
感通祇在五孝篇此道明明母語怪

九月廿三日城外紀遊

杪秋暇日休絃歌五門城外觀新河斗門決水已數日

淺沙漫漫無餘波從橫疏鑿引別派監官督役猶揮呵
循堤側足懼疏惡驚見崩圻當盤渦故橋舊市不復識
祇有積土高坡陀城南靡靡度阡陌疎柳掩映連枯荷
清臺突兀出天半金光耀日如新磨璣衡遺製此其的
衆植環倚森交柯細書深刻皇祐字觀者歎息爭摩挲
司天貴重幸不毀回首荊棘悲銅駝長春宮苑最宏麗
飛樓湧殿凌層坡喬松夭矯百歲物復有偃蓋低婆娑
平生素聞百一帖樂石壁置周簷阿金源中葉盛文物

玉堂學士鏘鳴珂旁搜紙墨作藻飾欲與唐晉爭嵯峨
至今摹搨傳好事道士却換人間鷺仙杯珍襲巨桃核
御畫雲鶴題宣和不知何處有此木偶爾結實良非他
瑤池漢殿語茫昧遂使世俗猶傳訛尋幽訪古意未已
起視落日歸禽多却趨林亭憇清絕盆菊采采黃金窠
蟹螯斫雪新醞碧對此不樂將如何京華酒壚萬歌舞
錦韉翠袖迎嬌娥儒冠已受俗子笑况復衰客雙鬢皤
下帷閉閣來跡少骯髒不肯侯門過清遊良友幸追逐

未忍返棹尋漁蓑今朝不飲心已醉笑看坐客朱顏酡
鳳城半掩歸路暝爭道擊轂如飛梭九衢冥濛漲塵霧
漸見燈火稀星羅作詩寫實不可緩馬上已復成微哦

北山行為方壽父作


峩峩仙華峯下有仙人宅右招括蒼之貞士左挽延平
之羈客一時山水鄉聚此文章伯君方壯歲清且閒日
操几杖隨追攀至今倡和猶在耳隱隱澗水松風間衣
冠雲散迹如掃白髮垂肩君亦老高門長缺不可彈邑

西結屋茨生草飛鴻印雪元無據北村之名不忘故時
時矯首家山路朝吟暮諷句清新甌無炊米妻孥嗔祇
有青山不厭人

憶去年

去年出神京南向官河路時當二月三月交杏花梨花
正無數丹霞素雪彌幾里白日青天映高樹舟行夾岸
看不斷竟日猶疑仍故處可憐春色值人愁血泪沾衿
不能賦今年家病劇忽忽春華度一枝不到眼到眼添

愁緒卧聽寒食雨三日想見離披委塵土山蹊野隴復
幾何向來竒觀真難遇我非世上豪侈翁對花酣酒娛
歌鍾祇恨家無千頃地盡栽萬樹開白紅佳事身健無
一事更有好友來相從微吟百匝遶花下滿懷浩蕩長
春風



禮部集卷五

欽定四庫全書

集部

禮部集卷

六至八

詳校官編修_臣錢樾

中書_臣劉源溥覆勘

總校官編修_臣王燕緒

校對官編修_臣沈清藻

謄錄監生_臣朱上林

欽定四庫全書

禮部集卷六

元

吳師道

撰

律詩五言

送友人

秋風吹古道木葉墮征衣
明月今宵缺孤雲何處飛
關山行路惡文字賞音稀
莫待相思劇天寒早賦歸

和陳端叔二首

高吟伴細斟清思淨塵衿
丹火栖霞井花香拂玉琴滄

洲風月滿紫閣霧煙深鴻鵠墮平地誰知萬里心

又

白雲燕薊北悵望兩分衿夏枕塵生扇南音思滿琴青
天孤鳥沒落日大江深聞欲飛車去高歌激壯心

和李坦之

丹房天柱陰客棹越江深鶴怨山中出龍聽石上吟天
光澄碧眼秋思冷瑤琴一曲歸來調風飛七澤音

送孫稅官

台山宦遊客長嘯水雲遙百賈日中市千航海上潮民
淳輸課集仙近賦詩招後夜歸舟路西湖何處橋

陳處士挽詞二首

端叔乃父

臺榭西湖上貂璫北寺中安知處士服竟老洞陽宮燕
薊風霜迫金張露電空骨歸魂漠漠故國野花紅

又

風雨前朝夢關河百里身白衣終晚歲丹鼎樂餘春令

子天涯客長懷闕下人存亡兩愁絕回首一傷神

和友人二首

吳越俄蕭索何鄉可定居乾坤有凶歲州里負冤書赤子魂如寄將軍腹未虛有才時不展感慨欲何如

又

俗徒不可語之子況離居江上又芳草山中無素書鳥鳴春樹靜花發酒尊虛相見應相問心情百不如

哀陳端叔

跌宕三千首淋漓一百杯公侯驚滿座賓客慕疎財書
帖蒼鵝換燒丹白鶴來斯人不復見揮涕惜多才

次韻林初心先輩二首

太史滯周南醇儒去廣川功名欺白髮風雨送流年故
國悲歌裏滄洲醉夢邊平生心似鐵相對肯淒然

又

倦客無人問逢人祇自嗟孤舟在江漢老夢繞京華聽
雨閒扉掩看雲短幘斜固窮吾已定莫向五侯家

春日雜咏四首

二月忽將半一春能幾時
寒隨鴻雁別雨赴杏花期
江水碧於酒山雲白似炊
登樓思無限孤客在天涯

又

雷雨連三日溪山擁萬花
晴呼禽磔磔風舞燕斜斜
默坐知春意幽栖感歲華
緼袍猶可貴護落任生涯

又

怒電時聞落驚雷夜轉多
摧花亦太甚裂樹欲如何
幸

不關調燮猶應廢嘯歌明朝好風日一舸弄春波

又

閒士偏憐日貧身不受春柴門花片落藤架鳥聲新寂寞清千慮妍華等一塵未嫌還往少應是不羣人

和元生惠韻二首

秀色浮芝宇清才映謝廷會須乘駟馬莫羨拜雙星對竹人俱瘦看山眼獨清漫郎最堪憶煙雨渺寒燈

又

春遊有夙約何處愜幽悰落葉江邊寺飛泉石上松飄
蕭憐野鶴唳咽笑秋蟲且共談文樂塵埃隔幾重

春日二首

雪盡清如洗江晴碧色搖春聲喧候鳥野色亂風條初
日暉暉淨遊絲去去遙意行仍得反佳興滿今朝

又

凍谷馮誰煖蒼規笑我方閉門春寂寂覽鏡歲堂堂芳
草仍無主歸鴻只戀鄉東風不世俗頻到讀書牀

六月二日市西避水三首

白浪風前濶青畦眼底無騎危爭上屋取快欲乘桴六月衣猶夾千山氣不蘇安流終有日鼓舞任天吳

又

久雨知天漏溪狂學海流驚呼聞壞屋捷足見操舟埒井誰為快乾坤等是浮獨憐如寄客漂泊幾時休

又

二十年前夢寧知復此來漲痕猶斷壁飲地已荒苔患

憂今逾劇風流逝不回江聲中夜急浩蕩有餘哀

宿龍華寺

河口龍華寺秋風駐野航雁聲庭左右燈影水中央
田里仍艱歲公私困築防無心共僧語憂惻漫彷徨

二月十七日寒食同胡子仁出城至廣教寺登

懷李

闕

寒食逢休沐幽尋喜不違山中懷李去陌上踏花歸
淡汎隨流水餘情付落暉他年記良會回首重依依

送張教諭之分水

騎馬青山縣彈冠綠髮年小淹文學掾却上孝廉船淑
士須經術汙人是廩錢相期振遠業宛水故多賢

送人北歸

被褐南州客依光北府居起辭從事辟歸讀古人書莫
雨江雲濕春風汙柳疎他年有來雁毋惜問何如

送王仲言升察院吏書

聖皇新下詔風紀肅羣綱江右循公選臺中得望郎功

名三尺法意氣九秋霜冠豸多知己能無重激昂

又

佐憲遊名郡摧奸奉渥條真才堅百練正色靜羣驕臺
府聞新辟叅軍愧下僚深知公論在相望未應遙

出蕪湖江口七月二十四日

江風淡秋曉締綵頓無顏黃葉下高樹白波吹亂山清
游仍覽勝久役暫知閑回首宛陵道依依更欲還

寒食

寒食偏逢雨貧家不識春
桐華閉深屋書冊擁閒身
忽韶華老茫茫世事新
平生祇自苦不與杯酒親

和孔用道御史留題韻二首

旌旗趨嶺海斧鉞下天關
甘雨洗四野清風生萬山
花飛公館靜草長縣庭閑
墨妙留題處光華復此還

又

衣繡層雲上乘輶萬里餘
詩清寫江竹食淡擷山蔬
白筆我冠薦青燈蠹簡魚
不才為令拙幸獲望前驅

又和前韻二首

宦情元自薄民事政相關日晏策羸馬春深思故山衆
人皆欲醉百計不如閑邈矣鍾期子瑤琴獨抱還

碌碌諸公後悠悠半世餘未辭陶令米敢厭庾郎蔬北
野非無馬南溟亦有魚永慙嘉邈客肯受俗塵驅

題官舍壁三首

拙令不諧俗頗希清靜風焚香小閣上隱几亂書中暫
喜過客少更聞甘雨通莫嫌官俸薄補報正無功

又

岼嶺小池上
翛然亭午涼
雨蒸藕花氣
風颭棗葉光
俯窺紫鱗泳
仰見黃鳥翔
所喜淡無事
與之情兩忘

又

官舍千峯裡
迎秋氣已清
池煙明鶴影
林雨斷蟬聲
紅惜芙蓉落
青憐荔薜生
今朝少公事
吟嘯且怡情

送嚴生教諭樂清

萬古斯文在
浮雲世故新
冷官寧下選
傑士肯凡民
書

史三年績絃歌一縣春妙齡勤自奮得祿慰雙親

又

雁蕩東南勝茲遊孰與同
衿靈開磊落文氣發奇雄
莫憶家居樂無憂廩稍空
遲歸行有日重咏舞雩風

中秋泊淮安望張仲舉助教不至

中秋淮浦夜誰共好懷開
看月坐復坐可人來不來
獨謠慙短思多病負深杯
想見蕪城路吹簫擁醉回

崔鎮宿遷舟中

柳陰望不極兩岸草蟲鳴積水經秋減清風終日生開
蓬看細字停棹問荒城知是邳州近青山數點明

咏臚

剡木誰為汝船旁兩翮斜畫波成々出語轉伊啞動
勢雖因手圓機為有牙莫嫌終夜聒相送到天涯

重過彭城

重遊彭祖國更上項王臺山接徐邳去河兼汴泗來闢
爭雄百戰吟賦萃多才人物今安在城笳莫正哀

徐生省親歸高郵

昔贊高沙邑重來二十年曾無嘉樹植猶有故人憐教
胃逢才俊思親輒誦絃願言敦實踐節孝是家傳

吳秀才挽詩

彥輝子

州來曾哭子豈謂復聞今甚切吾宗恨何堪乃父心青
蘭霜日慘白壁夜泉深賴有文章伯揚芳慰苦吟

贈苗伴讀試中觀歸省

用世春秋學成名弟子員少遲登仕版具慶及親年塵

匣新收硯水河不膠船到家多暇日慎勿棄遺編

送魏主簿

未識衡漳邑先聞簿佐賢氣應超矮屋聲已軋鳴絃春
雨花環郭秋雲稼滿田輶車有使者來應採風篇

送盧道士歸天台

誰謂神仙遠風聲在世間蘇耽歸養母賀老早還山之
子忽云邁斯人應可攀天台春已莫花落水潺潺

象山圖

突兀山如象東南縹渺間先生說經罷仙伯御風還瑤
草晚谿碧桃花春洞閑神京看圖畫塵土愧人顏

送郝州判之餘姚

東越之官地依舊所經乘潮下別浦佩印到公廷秧
雨春波白鹽煙海氣清有人傳美政應足慰予聽

玉泉山圖

何許泉如玉元因有玉人山暉神發夜木秀澤含春此
日還看畫無緣可卜隣寄聲嘉遯者莫污世間塵

送胡生之遼陽教官

夫子乘桴意終然墮渺茫千年逢聖代六籍到遐荒
馬隊褰衣講鷄林織錦裝還歸過吾里細與說遼陽

送邢晉卿御史言事去國

白簡當廷日青山入夢年身輕寧去國力在竟回天
峻節臺綱重清風奏稿傳聖朝旌直士未許竟飄然

題瀏陽李氏遺經閣

歐陽學士外家

瀏陽有高閣何似漢東居復見歐陽子來繡李氏書簾

金誰羨汝宅相足華予湘產多香草殷勤辟蠹魚

賦舒彥昭澹齋

方寸有天君休令渾世氛寒空清映月秋水靚涵雲
郎署雖升寵齋居獨遠羣應知舊遊者此意與平分

江山秋色圖

江南何處景一幅淡含暉草木半黃落樓臺深翠
微橋連秋水渡船與暮雲歸我亦漁樵客悵然思拂衣

送李巡簡

聞在鰲溪上
詵詵士子歸
忽更新武弁
寧志舊儒衣
野艸侵階長
山雲繞寨飛
淡然塵事少
與物自忘機

送尹縣丞之金谿

丞佐官非下
斯民委寄深
豈甘箝署紙
祇喜贊鳴琴
山好猶瞻象
溪清莫產金
前人有遺美
即此是官箴

謝堯章松巢

詩人清似鶴
雅意在巢松
風過條枝定
雲來戶牖封
輕身游太古
留爪記奇蹤
笑問騎鯨客
何如五老峯

題謝堯章君琬兄弟詩卷

謝氏家聲舊今猶好弟兄依依對牀語惻惻在原情露
萼花雖減春池草自生殷勤同姓老望爾早來京

題天台戴氏詩後

戴希尹者為軍器大監內附後或薦之不起
有子為教官與從子同徵亦辭從子仕至集

賢閣學士

闕

闕

榆林驛夕佳軒

客行關塞北萬嶺復千崖過雨夕陽好開軒山氣佳偶
然成勝事為爾發清懷千古困明意悠悠未易諧

送甘生南歸

去去從師樂無心志帝京河風送帆影墻日憶書聲萬
里須重到三年待有成獨憐倦游客白首不勝情

為葉敬甫賦母線石

密密線縫裳依依石在匡石如心不轉線與恨俱長尚
想精神聚寧容髮體傷殷勤珍襲意爾後永毋忘

送周剛東之大平縣幕

黃山當縣庭三十六峯青公事隨時了吟聲許更聽府
曹懷舊雨使部仰華星亦有經行夢追飛過敬亭

五言長章

壽張希孟叅議父濟南郡侯

聖主龍飛日高人鶴髮年耆英關景運風槩仰遺賢名

冠濟南士書藏圯上篇家庭台輔出茅土國封延高唱
追商皓間情寄渭川雍容鼎養樂蕭散地行仙緩景陽
春駐榮光賜節全式聞神降岳還有使傳宣稱壽歸馳
駟承歡快擊鮮極南星似李林下酒如泉碧藕香清露
蒼松鬱紫煙明生昨夜月涼入下秋天勝集駢車葢華
音被管絃紵衣輝玉杖綵服映貂蟬願借丹青筆摹將
四海傳

和黃晉卿北山紀遊韵

三洞金華北蒼蒼夾徑松瀉空噴百澗拔地立十峯林
石欹還整岩梯絕復通向田瑶草碧隱樹晚花紅歆竇
推丹入椒庭載酒從洗觥忙羽士捧硯喜山童陟嶺驚
逾峻公流竟莫窮千年杳仙鹿兩寺互僧鍾擘裂森開
峽傳聞舊化龍轉霆奔雪浪榮旱却玲瓏水際朱藤陰
岩阿青桂叢亭荒餘磊磊舊有磊磊亭
今字鐫石雲出正濛濛蘭
若知何許芙蓉復在東五磬隨屈曲一路聽琤琮山斷
俄爲野湍平不見空暮房深榻靜朝磬小樓重傳玩遺

髹鉢興嗟對殯宮拂衣登嶺去穿棘少人逢飛殿仍遙
峙重關故不封歸尋草堂卷坐戀水軒風雨紀三人合
相看一笑中孤蹤忻影逐薄枝愧才雄別袂分殘雨衡
門翳野蓬後遊寧未卜思劇漫憧憧

次韵王繼學參政胡古魚編脩剪燈詩

剡渚推冰紙并州剪水刀輕明新雅製麗巧極纖毫不
讓琉璃貴渾疑錦繡韜皺紋縈細縠疊縷引長縹花草
形相錯鴈鷺勢欲翔騰光宜秉炬透色賤塗膏愛著詩

聯綴嫌逢騎驛騷香風翻寶帶華月湧雲濤良夕娛佳
賞元臣念小勞都人應共樂歌舞送春醪

又

晏賞誇燈夕熒煌映斗魁新工出刀剪妙製壓樓臺寶
月團團現春雲細細裁千絲齊拂綴一篆百盤回華蓋
空中覆霓裳海上來驚颺白雪曲炤徹紫霞杯洛紙應
添價韓縢遂積埃光華傾輦轂吟賦動公台暗室毫釐
燭丹心戶牖開省躬方自感寧復說詩才

送袁奉御降香入閩尋母

使節光華遠親闈夢寐形秋雲孤影白春草寸心青純
孝通天意深恩出帝廷香從九霄下路向七閩經馳駟
程寧緩占烏訊有靈定應歌洩洩端自感冥冥聚散天
倫重悲忻雨涕零綠衣回萬里華髮共千齡寵錫翔鸞
詔歡迎擁繡輶丹青傳盛事垂世永晶熒

觀南陽高武宣王誥詞其子渾璞治書徵賦

歷數歸真主英雄起壯年挺身辭汝蔡仗劍走幽燕武

畧紛誰敵神鋒奮獨先攻城蒙矢石拓地攬山川淮甸
威如掃蠻方命已縣長驅越東角直擣海南邊名冠三
軍帥功開半壁天至仁惟不殺偉勳更無前鐵馬戈鋌
息貂蟬佩服鮮曹公創尚在鄂國志逾堅星隕悲蒼漢
山崇想故阡分祠遍南紀遺像儼凌煙疏傳曾開國承
家復象賢繡衣躬入奏丹陛詔仍宣聖代昭恩數王封
衍土田風雲攄壯氣日月漏重泉制闢奚斯廟光增太
史編哀榮十載少忠孝一家全奕奕丹青繪綿綿帶礪

傳桐鄉修秩祀願薦侑神篇

即事

上聖方虛已元台屢集凶雷霆轟震怒日月出冥蒙一
掃苛秦法重恢大漢風孔堂全簡在郿塢積金空覆轍
垂明鑒更弦起雋功威休閑一相黜陟正羣工急務除
民蠹先宜擇憲聰小臣圖報切無路獻愚忠

分題賦雞舌香送蘇伯脩御史之西臺

彼美南州產芳辛性不移品登炎帝錄名著漢官儀含

夜深滋古揚芬蔚吐辭從官陪論列微物得追隨忽跨
青驄馬將違白玉墀眷懷敷奏切西上且遲遲

送納文梁江浙省都事

分省東南重都曹左右并聳聞除目下欣值化絃更誰
甸新功業慈恩舊姓名揚鑣趨巨鎮振玉出神京臺閣
人爭送湖山氣已清進籌裨上宰提筆念蒼生春詔宣
寬大秋憚拔俊英茲行端不負持報漢公卿

和蘓公伯脩曲阜新廟落成

聖皇尊御極闕里重興文宮寢新儀盛牲醪特祭殷祝
辭宣上意銘石逮臣勲壇杏深凝露林楷密蔭墻鐘金
聲北奏衣布體三熏執法親遺裔言詩夙異聞遣祠承
寵渥序晏洽恩勤已定封公爵仍增守廟負山川方焜
耀天地正氤氲豈比東都碣僅僅傳韓府君

分題賦鶴川送蕭存道元帥之雲南

屬鶴慶路山水
幽雅多僧刹

鶴野遼東胄西南向鶴川山連巴蜀外江接夜郎邊箬
竹應穿密絕橋想度懸忽逢岩石勝豈憶地維偏佛刹

多金像夷居擁翠毡吏逢開府日人記督兵年警檄傳
飛羽行營息控弦蠻方寧復過祖烈幸重宣奉聖歌新
樂觀風續舊編翩翩此時興何必羨芝田

分題蕃宣樓送山僉憲之閩

大府開閩土危樓鎮海涯飛雲浮畫棟麗日照高牙昔
駐蕃侯馬今迎使者車三山歸指顧萬井仰光華縹緲
臨城處逍遙散吏衙榕陰千樹翠荔子半空霞嶺嶠俱
清謐賓僚亦靜嘉宣風問民俗作屏扞皇家去去青冥

樾依依紫禁花登高應有賦留待碧窓紗

次韵許可用參政從辛承天護聖寺是日陞左

丞

西北羣山迥盤盤護帝鄉玉泉流海潤金刹倚雲翔四
月龍舟邁十官馬首驤落花紫劍佩高柳拂帆檣采女
遙分隊材官迸綴行和聲宣鼓籥珍獻集梯航天雨清
初霽湖波靜不揚瓦光浮璀璨鈴語振鏘鏘梵唄雷音
偈醍醐雪色漿玉牀敷御座翠殿散天香內晏筵初秩

仙韶樂更張騶虞遊近野黃鸝下迴塘馳道風隨輦行
宮月轉廂應同遊上苑何似幸雲陽心共斯民樂謨咨
上相良傳宣升列輔稽首答休光勲業期千載精神萃
一堂序調堯歷象澤浹舜要荒盛事傳新句迂儒乏寸
長願將歸美意弦誦播脩廊

送趙生時立

漫倚成均席居然乏友朋獨憐故人子相伴夜窓燈學
自言詩悟才須辨秀升重園頻遠訊長路忽先登建業

十峯霧漳河十月冰青春期正遠白首仕無能我亦思
兒輩因行恨不勝

分題賦白簡送李惟中治書之西臺

執憲崇臺府脩容象物宜挺然元不撓皦若自無緇玉
雪齊心映風霜入手隨立當文石陞攜赴紫囊絲簪筆
應同色持書允有儀奉條嚴糾慝對命謹書思西陟分
治日中朝注倚時脩名青史冊素志白圭詩正直神斯
聽清明世所知當年魏公笏此事即吾師

分題賦漢陽樹送蘓伯脩參政之湖廣省

江漢交流處川原樹杳茫
晴光朝歷歷暝色暮蒼蒼
陌上平如薺煙中密布行
蔽虧城隱見掩映屋低昂
秋引登臨興春生戰鬪場
鳥聲樂林莽牧地富耕桑
政府迎參預儒紳動寵光
功懷神禹栢菱咏召公棠
大別忻移棹南樓想據牀
殷勤與封植清蔭被炎荒

禮部集卷六

欽定四庫全書

禮部集卷七

元 吳師道 撰

律詩七言

八陣圖

慘淡風雲舊指麾
濤聲洶湧尚含悲
握奇智在人誰識
長嘯神遊石不移
天下奇才司馬嘆
江流遺恨杜陵詩
當時萬事皆天意
三酹英雄誦出師

寄友

聚散悠悠水上萍相思千里夢魂驚門扃白日閒花落
愁入春風芳草生天北雲遙回雁影江南春盡老鶻聲
飄零王粲今何處想見登樓此日情

送林初心

溪上開樽洗客塵千篇高咏句清新春風冠蓋英雄夢
夜雨江湖老大身萬里燕山馳壯氣十年吳國起閒人
來時須得文章力去看薇花紫禁春

游仙居南峰

并序

大德十年秋余來仙居聞南峯為登臨佳處
而未之識至是偕邑人往焉山去郭數里而
近仰見白塔立雲表踏落葉綠嶺上空曠極
目無際達興道寺章安尊者道場近時邑士
吳君直軒講授寓馬右偏小軒為臨眺之所
羣峰拱環一水回互寒暉清氣蕩溢心目平
沙遠村煙樹魚鳥如墮瀟湘圖畫中視軒扁
藍光大字瘦硬可愛梁間題郭三益楊宗山

劉明府陳古靈先生詩在旁有近人登高懷
古詞亦悲壯時衆客互觴喧嘩余獨操片紙
吮筆視佳者記之癖好類如此客有導余循
東廡拂塵壁讀陳仁玉擬騷詞陳風流文翰
有名喜觴咏山水間嘗視軒前小阜營葬穴
今其後業不復葬悉為勢家有客感舊故嘆
息不已余亦愴然既而曰人生良會開口一
笑不易得今古興廢事奚足介哉于是舉酒

相屬樂甚顧日欲暮半醉而罷余聞天下奇
觀往往因文人勝士題咏發之今南峯溪山
甚佳留題甚多古靈不可尚已如郭三益詩
亦清麗惜乎傳誦者少而南峯之勝不得附
之以題也茲遊不欲作詩客請為倚歌和之
非求多之也庶將著其詩而廣傳好事者耳
藍光軒外空煙輝鷺鷥石上寒風漪秋高林薄衆葉脫
日暮澗谷孤雲歸山空竹靜僧眠熟舟閑江清人渡稀

憑高把酒渺今古浩歌興逐征鴻飛

赤壁圖

沉沙戟折怒濤秋殘壘蒼蒼戰鬪休風火千年消伯氣
江山一幅掛清愁丈夫不學曹孟德生子當如孫仲謀
機會難逢形勝在狂歌弔古謾悠悠

溪亭夜宿

閒亭來伴野雲棲剪剪東風冷客衣孤鶴有聲溪上啄
落花無影月中飛愁銷綠髮三春過夢拂青山半夜歸

混迹漁樵莫惆悵得時奴隸總輕肥

和逯彥常留別

落日平蕪轉晚暉西風殘葉攬秋飛江南煙水孤鴻冷
冀北弓刀萬馬肥零落酒徒愁夜夢支離冷骨怯秋衣
劇談之子聊相慰莫向青山又賦歸

野中暮歸有懷

野田蕭瑟草蟲吟墟落人稀慘欲陰白水西風羣碓急
青林暮雨一燈深年豐稍變饑人色秋老誰憐倦客心

酒禁未開詩侶散菊花時節自登臨

送郭推官之吳興

水精宮裡宦遊鄉聞道賓僚藹俊良清氣入懷生翰墨
仁風到處洗桁楊深春柳色湖亭靜落日蘋花客棹香
我欲縱遊身未許夢思風物九迴腸

水軒

碎萍落落點清圓山影簷花不碍船荷柄倚闌高似竹
龜兒出浪小于錢敲針作釣凌風立疊石為床聽雨眠

塵慮繞纏君自爾林塘何處不脩然

寄葉審言并簡晉卿

燕塵越水舊衿裾何事今年賦遂初肉食終還虎頭相
身謀可復兔園書閉門深巷楊花蒲送目停雲暮雨疎
不見黃生今數月因君聊與問何如

寄張子長

落落長遭俗子憎別來懷抱向誰傾有時錯莫呼張丈
無力吹噓薦賈生叱石山中尋藥侶翫雲林下讀書聲

知君亦有逍遙興肯與卑棲嘆不平

次韻遊山石寺

雲鎖幽源護隱丘君因遠棹適良遊江潭日炤魚龍野
佛殿山空草木秋山竇泉香聊作供題詩僧去獨含愁
肯將塵事妨清賞不盡登臨興不休

次友人韻二首

風埃飄泊望誰收勁氣盤盤狹九州鄭老有才翻得冷
沈郎自瘦不緣秋芙蓉白鳥滄洲思蔓草荒庭落日愁

客裡得錢那惜醉歸來瓜芋熟西疇

又

膏火錐刀祇自焚莫將清氣一時分休文溪上多明月
弘景山中有白雲詩思凌秋添勝語丹經參夜得奇聞
飄飄物外何須恨漢世公卿貴少文

送李僉憲行部之越

天上神仙氣自清南行萬里識儀刑繡衣使者新持斧
國子先生舊執經馬蹋秋原風獵獵雕盤霜浦日冥冥

縱吟太白詩千首天姥雲門近眼青

寄李坦之

九瑣三茅仙聖宮故人招隱幾時同青楓月落重江外
翠袖天寒絕谷中文字相知惟我爾精神不隔漫西東
長安冠蓋紛如數關老誰憐賈興終

和黃晉卿客杭見寄

一從君客江城去詩思淒涼酒盞空天末倚樓孤岫雨
春深閉戶落花風半生正坐才名悞萬里誰憐意氣同

坐憶王孫咏招隱萋萋草色向人濃

又

書問蕭條已半年知君近買過湖船江花日暮吹紅雪
店樹春晴起綠煙客裡光陰遽如許人間岐路正茫然
離羣得似游從樂紙貴錢塘日萬篇

又

翰林學士巴西彥天祿儒臣漢世雄一笑吟邊餘故老
並遊方外亦清風吳天有象星應聚冀北成羣眼已空

十載神交未相識
卧淹幽谷恨羈窮

喜雨

高隴深溝有剝泉
風雷仍及望霓先
涼思到骨甦中夜
饑火燒腸洗積年
上帝自仁寧為吏
書生有喜豈須田
東南米價明當賤
擬辦狂遊萬里船

寄蔣山長

吳興博士荆溪上
別去無書十載強
浮世升沉堪一笑
勝懷吟賞未相忘
鯨翻寒日江湖白
雁叫秋城草木黃

猶有舊時詩卷在，高歌聊復慰淒涼。

贈王生

嗜酒王郎復好吟，紫髯如鐵氣蕭森。
歸帆千里歲年晚，破屋一羶風雪深。
痛飲廣文逢勁敵，獨歌郢客見知音。
五雲東畔三峰路，別後相思試一尋。

次方韶文三首

婺女城頭掩半扉，沈侯樓上領斜暉。
聽鴻前度同遊盡，化鶴重來萬事非。
山水娛人真不惡，文章驚世故多違。

何如有酒身長健
竟月登臨莫便歸

又

倚空風穴瞰岩腰
天與幽居物色饒
玉女靈旂香晝永
石壇仙樹長春條
百年遺老風流在
千里浮雲夢寐遙
我亦平生愛丘壑
相從煮石爨枯樵

又

昨歲郎君一再臨
坐成久別思難禁
雁回衡岳夜雲白
花落湘潭春水深
縱覽山川誰似爾
爭雄文賦古猶今

倚門莫怪歸來晚遊子終懷寸草心

東王仁境

有客空齋嘆不歸鄉心二月亂于絲杏花深巷春風夢
茅屋荒田夜雨詩天氣未佳宜小住人生行樂竟何時
乞君安得千壺酒爛飲狂歌慰別離

送許益之赴趙侍御招二首

揚帆千里載書琴此事光華喜見今青眼憐才真有道
白雲出岫本無心校書燈火西齋靜聽講衣冠北府深

歲晚幽期良自保孤根未恨遠穹林

又

繡府烏臺峻碧霄金陵佳麗未蕭條詩書正氣屯諸彥
花月殘歌笑六朝山倚石頭青入畫江吞天際白吹潮
勝遊健筆追雄渾為寄林間慰寂寥

送人之台州

六月征途盍小休振衣邁過海東頭半空霞赤山初曙
絕頂夜涼江正秋詞翰清妍應有助簡書容與定無愁

升沉一笑幽期遠肯向滄浪寄野鷗

送吳閑閑真人還山壽親二首

翠蕤芝蓋襲靈芬名在鈞天四海聞重見蓋公隆漢室
由來番國入吳君三秋勝日雙親壽一沼清遊萬里雲
肯詫光榮動閭井祇將忠孝荅殷勤

又

天恩親許拜慈顏飛鳳銜書逐珮環江上白雲秋近舍
人間紫氣曉浮關木公金母齊高第芝草琅玕蒲故山

千載楚菜芳躅在羽衣交映彩衣斑

答蔣春卿見寄韻

雲錦衣裳侈貝璣娟娟秋水隔相思書來南國魚千里
愁入西風柳萬絲久別忽驚詩句好重親未覺髣髴衰
多君世外殷勤意古道寧論俗子疑

客杭九日別柳道傳黃晉卿出飲江頭陳氏樓
客雜甚二首

薄陰江日淡暉暉殘葉隨風上下飛陌上吳兒應競賞

天涯陶令正思歸
秋花廢苑連金剝
晚樹平湖出翠微
千古興亡竟何極
不須登覽重沾衣

又

黃菊開時酒價廉
晚聲沙市簇青帘
不堪衣袂猶為客
偶上樓頭試捲簾
良友相逢還易別
老兵對飲且無嫌
西風放棹龍山去
何必疎狂脫帽簷

送孫伯芳致意姚子敬

下帷閉閣想無羣
落落經時一過君
俚耳誰能知白雪

閒身那得似浮雲憂來意緒迷唐尹別去緘題憶右軍
歸見西州里名士為言吾甚敬斯文

讀唐末史事

黃屋漂搖劍戟圍草荒城闕淚沾衣空吟陌上行人去
誰救山頭凍雀飛計失廷臣無遠略途窮天步總危機
晉陽一旅開洪業落落關河蒲夕暉

送友人之關西

相逢未久復相違足馬西行壯氣馳弧矢四方男子志

煙花三月故人思秦山渭水金城國漢闕唐陵野草碑
萬里茲遊何可絕閉門笑我白生髭

京城寒食雨中呈柳道傳吳立夫

春深不見試輕衫風土殊鄉客未諳蠟燭青煙出天上
杏花疎雨似江南松楸昨夜頻來夢樽俎何人可與談
閉戶不知佳節過清泥滿道沒征驂

三月二日麗正門書事

萬騎遙聞發上林內前車馬去駸駸風回輦路香煙合

雨映龍樓柳色深
淮卒屢呼驚
過客伶官凝望促
華音
修門此日逢佳令
咫尺清光倘炤臨

恩榮宴

聖主龍飛第一春
造廷多士際昌辰
墨痕金榜雲煙濕
花艷瓊林雨露新
千載文明開至治
九天恩重愧微身
輕肥不逐時人夢
誓守平生一念真

送劉縣丞之官寶應

人言淮俗稍真淳
君去扁舟早問津
鐘鼓京城五更夢

劉居鍾
鼓樓前

弦歌沙市萬家春
名城尚記唐年古
作吏當如漢世循
同是青衫更鄰壤
後來還許望音塵

送陳鍊師歸越

楓葉橋邊一振衣
瓊臺璇館動光輝
浮雲散盡青山在
華表依然白鶴歸
方外祇今猶有事
人間何處可忘機
慶湖禹穴經過地
且莫停舟訪落暉

慶湖千秋觀禹穴
告成觀今皆為寺

送潘生歸天台二首

昔遊曾擬上天關
風雨窮秋路阻艱
俗駕竟回蒼嶺下

夢魂長遶赤城間黃精仙樹年年長幽澗寒雲日日閒
之子明朝却歸去愁今浩蕩杳難攀

又

陋巷蕭然可設羅比鄰祇怪數經過秋風海國芹初熟
今雨柴門草更多心醉豈嫌無痛飲情親不恨有離歌
故人憶我還相問耿耿應知未肯磨

送瓜爾佳知州

陋邦寧足駐旌麾不待尋常報政期宮有藻芹歌未已

囊無意以謗何為累累金印青雲在落落丹心白日知
得意辱庸非所羨祇留遺愛使人思

寄劉士明同知

前望譙樓帶古城濯纓河畔水泠泠共分草徑臨門入
最喜書聲隔屋聽官路馳驅足塵土人生聚合等雲萍
琴清茗冷何時共直待秋風月滿庭

校視水災

扁舟為榻水為家竟日茫茫不見涯草際溝畦行估曲

風前几席坐欹斜
官箴迫我寧無畏
世事違人祇自嗟
遙憶鄉山好兄弟
登高把酒對黃花

題僕氏牡丹圖

翠葉扶疎映綵霞
天留飛蝶守單葩
共驚冬樹移春艷
須信人文表物華
雒水千年重有譜
長安一日更無花
至今好事看圖畫
誰似高昌進士家

送劉君錫宰興化

誦詩三百政云何
出應時需績已多
要為朝廷陳雅頌

先令井邑化弦歌淮鄉歲晏鴻安宅海岸雲橫水息波
喜報太平寬詔下早宣德澤趁陽和

次韻九日

卧看衡門落葉飛飽餐葦菊露香微潘郎有句休驚老
陶令無錢合賦歸忤俗形容祇白眼娛人山水足清暉
約君同上南岡頂長嘯秋風一振衣

寄題感應夫人廟

王仲達州判先世

王洲洲上舊家鄉貞烈千年儼未亡寧使丈夫專廟食

金少隱公集 卷七
應隨王母共仙粧暮雲冉冉靈旗杳社雨霏霏醴酒香
定有天恩侈封秩聞孫朱紫看成行

重贈王月屋相師

編詩猶記十年間一笑春風萬里還老眼依然天上月
青鞋未了浙東山自知生世非奇骨祇喜逢人不厚顏
為問何時遂幽隱雲林相伴著柴關

和劉謙甫二首

時永福寺避暑

茗甌詩卷代壺觴借卧僧坊百尺廊林下何人共蕭散

世間無處覓清涼
水花曉立淨池月
風磬晚傳幽殿香
獨有閑時心未已
夢思霖雨起賢良

又

毒日餘威尚鑠金
秋期過半竟駸駸
愁聞赤地呼天泣
夢憶青燈付雨吟
困頓吾生甘俛首
紛紜世事只驚心
褰衣高咏紫芝曲
何處雲林深復深

時五月望後不雨至八月

和吳教授韻二首

客居未定復窮年人事多違一任天薄宦已貽高士笑
短才敢望達官憐簿書草草寒廳底風雪蕭蕭瘦馬前
自倚此心堪對越不須香火効精虔

又

杜門飲水可忘饑半世迂疎已自知栗里園荒愁有夢
敬亭山好愧無詩萬間誰肯容寒士五斗猶須向小兒
回首京華舊游處題名虛忝監中碑

送陳汝錫錄事歸湖南寄意楊梓人張幼擇二

同年二首

參軍俛首困奔趨，豪氣如君世所無。
餘子下風樓百尺，嘉賓勝日酒千壺。
敬亭遊騎留題句，湘水歸帆入畫圖。
臺省翱翔真易事，人生誰似彩衣娛。

又

姓字慈恩忝後塵，一官繼武復宣城。
仰驚健翮青霄去，却笑疲駑峻坂行。
舉世安知吾道重，與君相印此心清。
湘中舊友煩多謝，春雁回時始寄聲。

和芊布曾憲史韻二首

高步青霄計未差，征途祇暫走塵沙。
煙波江上吟芳草，風雨城東看落花。
攬轡欲追千載士，扣門肯向五侯家。
遙知齋閣清無事，蒲案殘書整復斜。

又

平生忤俗苦無朋，心事蕭然有髮僧。
作吏祇師三尺法，讀書肯負十年燈。
空持璞玉嗟誰賞，誤落樊籠去未能。
夢憶金華三月暮，踏雲穿雨上蛟層。

夏日田家和胡子仁韻

小溪百曲帶山長
五月田間始插秧
桑燭風懸墮平地
麥蛾雨化出空場
村煙翳翳雞犬近
茅屋蕭蕭竹樹涼
疲馬奔忙祇自笑
遙聞何處煮茶香

和韓廷玉韻

脩門咫尺足揚眉
縱覽山川自好奇
春水北溟鷗化早
秋風南國雁來遲
上林鉅鹿能忘賦
疊嶂蒼寒正入詩
賴有同時賢掾史
相知不負此心期

送馬元博升察院書吏

科目聯翩好弟兄十年早已到公卿
飛鳥又報臺端集神駿偏依冀北生
江水帶城佳麗地春風著柳別離情
升沉咫尺仙凡隔相念能無一寄聲

和吳存吾題金華山鹿田寺

金華峰頂前朝寺曾拂題詩古壁塵
岩洞清遊如昨日雨雲寒夢共深春
他人豈比余同姓異縣寧知此卜隣
多謝聞孫意傾倒借書開鎖不嫌頻

秋日登景德寺小閣

開元水閣今何處
此日登臨憶杜郎
落木高城秋浩蕩
亂山平楚暮蒼茫
前朝事往空遺跡
倦客愁來只望鄉
何似閒僧深閉戶
蕭蕭寒菊數叢黃

游三天洞

稽亭山下三天洞
憶我金華物色同
拔地飛崖雲洶湧
映空嵌穴樹蔥蘢
不知混沌何年鑿
直恐神仙有路通
終擬赤松歸隱去
清遊還墮夢魂中

中秋次同院人韻二首

鳴騶雜遝欵庭中宴罷扶攜看醉翁
禁鑰鎖深秋院月天香吹濕露華風
終宵倚樹憐吳質何處登樓覓庾公
挹取清光炤方寸此時分散莫匆匆

又

江右衣冠代不空况聞熙運日方中
詩書有造興周學文賦多才侍漢宮
願識龍光天下寶厭聽秋露草間蟲
選掄此日陪諸彥淺薄慙無報稱功

留李王河驛會括蒼友人

斷港今猶說李王
長江元不管興亡
淮山終日空凝碧
河柳經秋未隕黃
多謝長風留過客
相看好友話同鄉
行歌拾取磯頭石
攜袖歸來比夜光

驛在池陽上七十里江邊小石通明

愛可

送楊志行待制赴北

南士今誰列從臣
喜聞新命掌絲綸
中天日月開昌運
當代文章屬偉人
蓮炬正紅宮漏夜
柳絲初綠御溝春

平生經濟匡時畧獻納應須得細陳

貢仲章學士挽詩

鄧來相繼厭人間公又云亡我涕潛文采頓消南國士
儀形空想北門班百年鄉夢應先覺萬里祠官竟不還
悵望簫笳動哀曲湖風吹浪雪堆山

九日病中東邵章甫令尹方公亮教授

卧病深居斷往來釣簾強看菊花開江山信美非吾土
風日雖佳負此杯萬事心違將老矣四年客倦盡歸哉

登樓援筆猶能賦眼底誰憐宋玉才

謝別趙子威憲掾

歲晏蕭蕭雪擁門軒車肯顧病參軍
非關知己無青眼自為懷鄉有白雲
風采一時傾北府心期千里重斯文
敬亭山好何堪戀獨恨相看却袂分

中秋次劉經歷韻

雲擁銀盤上海濤風吹金粟散江皋
氣屯多士潮增壯塵淨孤懷月共高
惜影來思尋夜枕分輝直欲到秋毫

崇文堂上官壺酒記取今年與燕毛

贈史廉甫

棘闈重重深鎖闕佳士一笑開心顏共看中秋浙江月
却話西蜀峨眉子拋簿書暫過適我困朱墨方未閑
不辭題詩記良會他時相值青雲間

彭子中從龍麟洲先生校文赴郢城教諭

從師有樂世誰知縱覽詞場亦一奇雨閣湖山秋隱隱
風簾燈燭夜遲遲升堂惟許彭宣侍薦士應無杜牧遺

此去還聞郾城析回頭須憶笑談時

喜白髮劉師魯徵賦

紛紛兒女政堪哀只恐流光髻底催
百歲總為黔首誤幾人得插素標來
鼓風紗帽從吹頂簪雪花枝且照杯
自許貞心比松柏不隨秋卉共凋摧

再和鹿田寺吳存吾詩韻

十年不到雲間寺白石清泉笑俗塵
壞壁詩存蒼蘚古空山鹿去野花春
舊僧零落多歸塔劫火蕭疎近失隣

好事主人能釀酒從今來往不辭頻

題黃晉卿應奉上京紀行詩後

居庸北上一千里供奉南歸十二詩紀實全依太史法
懷親仍寫使臣悲牛羊野濶低風草龍虎臺高樹羽旗
奇絕茲遊陪禁從不才能勿愧棲遲

寄貫子素監州二首

妙年富貴復何如自愛名家萬卷書南紀尚開

闕

國

東方不戀使君車滄洲野鶴同來往碧落閒雲共卷舒

軒冕鼎來非分外素心祇喜未忘初

又

聞道今年入帝鄉扁舟春水下衡湘鄂公圖像淩煙閣
坡老文章白玉堂俛仰應無慙世美經綸盍亦濟時康
却思送別西湖雨後會重逢話更長

送王巡簡

丞相傳家笏尚多將軍橫槊意如何踏花驀裏村無事
送酒玲瓏座有歌白日萊衣動光彩青春槐樹長枝柯

雙溪咫尺聆佳語未用離愁賦綠波

禮部集卷七